

# 佛說大威燈光仙人問疑經

隋天竺三藏法師闍那崛多譯



南無本師釋迦牟尼佛

## 說 明

本繁體校正版《佛說大威燈光仙人問疑經》電子書，是根據《乾隆大藏經》大乘五大部外重譯經，第 0207 部，隋天竺三藏法師闍那崛多譯《佛說大威燈光仙人問疑經》影印本校正的，標點符號僅供參考。特此說明。

仁慧草堂

二〇一七年八月

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.  
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 開經偈

(一編)

無上甚深微妙法 百千萬劫難遭遇  
我今見聞得受持 願解如來真實義

# 佛說大威燈光仙人問疑經

隋天竺三藏法師闍那崛多譯

如是我聞：一時，婆伽婆在伽耶城成道未久，與諸比丘一切衆俱。其中，或有得於一果及以二果、三、四果者，隨其得果所有功德，皆悉明淨。復有九十九億諸菩薩衆，及二十八億諸天衆等；復有比丘、比丘尼、優婆塞、優婆夷無量衆數，及六萬力士、十二億等諸尼乾子；復有八萬四千五通仙人；復有五百諸外道等。皆悉以灰塗於身體，露現胷臆，肉盡脂消，惟餘皮骨，傴僂曲背，結髮自裹，披樹皮衣，手執瓶罐，處處尋求語言論義。

爾時，世尊如須彌山處黑山內，光明照耀，威德絕倫；如來世尊亦復如是，於諸仙中，爲最第一。又如六牙清淨白象獨自在於白羊群內，如月夜朗映蔽衆螢，如曼陀華生蘆葦町，如金翅鳥處在鳥群。世尊於彼諸仙衆中亦復如是，威德照明，倍復殊勝。爾時，世尊即便入於寶捨三昧，現無量神通，普放淨光，遍身明曜，於身左右，遞相交繞。又於自身出無量億諸化佛身，一一化

身復出無量億諸化佛；復自身中出無量億諸菩薩身、無量帝釋身、無量梵王身、無量四天王身、無量百千阿羅漢身、無量百千比丘、比丘尼、優婆塞、優婆夷身、無量大轉輪王身、無量小轉輪王身、無量粟散諸小王身、無量東海洲中邊地人身、無量南天竺等所有諸地一切人身、無量刹利大姓、諸婆羅門等、大富長者、一切人身，如是等種種形類，種種服飾，種種言說，所有一切諸天界分，一切皆從如來身出。

爾時，一切大眾，各懷疑心，遞共相觀。時諸菩薩，皆大歡喜，雨諸珍寶供養之具，乃至瓔珞，供養如來。

爾時，世尊現是瑞已，還從寶捨三昧起。起三昧已，如師子王嘖呻顧視，普觀十方。觀十方已，即時見彼十方世界，一切所有諸佛刹土，及此娑婆大千世界，以佛眼觀，分明顯現，猶如掌中。如此釋迦如來放大神通，種種變現。十方一切諸佛，亦復如是現化佛身，從化佛身示化佛身。彼諸如來所有化佛，皆來雲集世尊大會。復有無量恒河沙等諸菩薩眾，比丘、比丘尼、優婆塞、優婆夷過諸譬喻，各執種種供養之具，隨其所應堪供養者，來詣佛所。復有天、龍、夜叉、乾闥

婆、阿脩羅、迦樓羅、緊那羅、摩睺羅伽、人、非人等一切大衆，隨其住處，皆見如來神通力已，從彼而來，赴此海會。

爾時，十方諸來菩薩，各以無上供養之具，供養如來。設供養已，各以六波羅蜜之所成就師子高座，隨其身量稱座而坐，乃至人、非人等，各稱身座，復座而坐。釋迦如來所教化者，上至阿迦尼吒天，下至阿鼻地獄，所有化類，皆悉而還，還已，當於是時，以佛力故，皆見十方諸佛世界，猶如一會，所有十方一切諸佛所教化者，一切皆從釋迦如來諸毛孔入；釋迦如來所教化者，皆從彼佛身諸毛孔入。現如是已，當爾之時，於彼衆中，有一菩薩名曰勝分，從座而起，進止庠序，容貌端嚴，偏袒右肩，右膝著地，合掌向佛而說偈言：

|       |       |
|-------|-------|
| 佛世甚希有 | 爲衆故顯現 |
| 此事未曾有 | 覆蔽一切魔 |
| 遞共相觀面 | 唱言希有事 |
| 我等何故來 | 出言我破壞 |
| 我等輩可憐 | 惟首骸骨消 |
| 我等既羸瘦 | 枯老復失樂 |
| 無言字神通 | 覆翳我道刺 |

大神通佛子 今自顯佛法  
此衆生疑心 復生大歡喜  
此會皆出言 我等願作佛  
文殊在衆中 佛子衆圍繞  
文殊侍多佛 來顯說神通  
爲何法現相 今佛說何法  
咸生是疑心 願爲我衆說

爾時，彼衆中以魔力故，有一仙人名威燈光，即白勝分菩薩言：“童子，汝且默然，我今發問，若是沙門能決於我心所疑者，乃可得名爲薩婆若。若不能決我疑心者，云何得名一切智也？如是神變若幻作者，摩醯首羅、那羅延等所說呪咀，凡世間人用是法故，亦能成就諸如是等無量之事，豈足爲奇？”作是語時，如來世尊熙怡微笑。既微笑已，普觀諸仙一切大衆。觀察衆已，即告威燈光大仙人言：“汝威燈光，今正是時，恣汝所問，如我智力，爲汝解說。”

爾時，威燈光大仙人即問佛言：“瞿曇沙門！先與我說衆生體者，從何處生？幾麤幾細？衆生內體性者，爲一搩耶？一尺耶？一指耶？乃至若大麥、小麥、大豆、小豆等分耶？乃至芥子許衆生內體性耶？”作是問已。

爾時，世尊即讚威燈光大仙人言：“善哉！善哉！汝威燈光快問是義，如六萬劫壽命者。”

爾時，世尊作是語時，諸仙人等皆大驚怪，作是念言：“我等與彼大仙久居共在一處，猶尚未知大威燈光壽命筭數，今是瞿曇云何速得如是覺知？”

爾時，世尊即復告於彼威燈光大仙人言：“汝大仙人，諦聽諦受，善思念之，吾當爲汝具足善說。汝問我言：‘衆生體者，從何處生？’大仙當知，實無言說，無有字句可說，衆生有所從來，但以無明行等諸因緣故，起彼衆生，乃至生老病死等諸因緣故，起彼衆生。大仙，復有因緣能起衆生，所謂以母爲因，以父爲緣，得生衆生；復次，父母和合以之爲因，邪念妄想起諸業風，吹識種子置胎藏中，即是彼緣；復次，苦聖諦，集、滅、道聖諦是衆生也；復次，五陰分、十八界和合故是衆生也；復次，大仙，不離衆生有業，不離業有衆生，衆生是業，業是衆生。汝當知之，衆生界者，不增不減。”

大仙人言：“瞿曇，若衆生界不增不減者，何故衆生捨垢身已，得自在身？”

佛言：“汝大仙人，如汝所言，是大不可！



何以故？若自在得自在者，應不墮落，常在自在中。若自在身不得自在者，云何名得自在也？大仙人，譬如螢火蟲作是心念：‘我光明焰悉能遍照於閻浮提。’假使螢火蟲實能放光遍照閻浮提者，終亦不能使無伏心者得名真自在。復次，大仙，若自在得自在者，應盡諸煩惱垢；不自在故，應長諸煩惱。若諸煩惱垢與自在等共有者，是故衆生界，無有增減而可見也。”

時，大仙人復言：“瞿曇！汝可不作盡諸煩惱耶？”

佛言：“汝大仙人，我亦不作盡諸煩惱，亦復不增諸煩惱。”

大仙人言：“今汝瞿曇，若如是者，亦不應言我得自在。”

佛言：“大仙，如是！如是！大仙當知，我亦不言我得自在。何以故？我無實故，亦不自在。”

大仙人言：“汝瞿曇且置是語！瞿曇，如汝前言，父母和合得衆生生者，何故多人共和合，少有衆生而得生耶？此義云何？”

佛言：“大仙，我今爲汝所引譬喻，隨汝所能，爲我解說。汝大仙人，如有一子中多有樹生，復一樹中有無邊枝，一一枝中復無量華，是一一

華應各結果，何故有結、有不結者？若已結者，皆應成熟中作種子，何故復有熟、不熟者？此義云何？”

大仙人言：“瞿曇！由風吹故，有結、不結。若已結者，墮落不熟，不任爲種。”

佛告大仙人：“以業風自轉吹業衆生，果墮落故，少有衆生而得生耶？大仙人，汝當知之，若在胎中，或爲蟲食，或爲業風轉爲碎末。汝當知之，樹灾墮落少不足言，所有衆生爲灾墮落多不可說。復次，大仙人，以邪心故起衆生界，若諸衆生能有幾許心想轉者，還復爾數受後有生，是故我言，邪心故起衆生界。”

爾時，大仙人言：“瞿曇！如是！如是！如我所問，汝已答我，此義得成。瞿曇，更復爲我解說，何以故有劫燒盡也？”

佛言：“大仙人，汝當知之，無作故名爲法界。若劫盡時，大地不燒者，法界便有二種，少有分是無常，少有分是常。若如是者，是諸如來則亦不成爲實語者。若一切無常，無爲法中不可思量者，是故如來得名一切智。”

爾時，大仙人聞是語已，迴首顧語自諸弟子言：“汝知之不？此瞿曇者眞成是於一切智也。”

爾時，世尊復更重告大仙人言：“若劫盡時，一切大地不被燒者，不得分別此是初時，此是末時。亦復不知好醜業果、善惡等報。汝當知之，此劫燒時，焚蕩盡者是諸如來大方便力之所爲也。所有衆生，若能聞信劫當燒盡洞皆然者，爾數衆生，諸如來邊受諸攝受。汝當知之，如大蟒蛇身分所有眼耳口鼻，以毒力故，悉能攝受一切飛走雜類衆生。應知如來亦復如是，以布施愛語，利行同事法毒力故，悉能攝受調伏一切諸衆生也。大仙人，又如果有人，以其金鋌置在火中，不以瞋恨置於火中，以不熟故，欲令成熟，爲欲成就眞寶物故，爲令價大得多財故，置金火中，連椎交打，柔輦清淨。如是一切諸衆生輩，莫不皆因諸佛如來放劫盡燒而得調伏，如是劫盡大地燒時，實無衆生受苦惱者。”

大仙人言：“世尊！希有！可得劫盡火焚燒然大地壞時，無一衆生受苦惱者。”

佛言：“不也。大仙人，諸佛如來不令一衆生受逼切惱，何以故？大仙人，譬如十方微細雨滴，彼諸雨滴寧爲多不？”

大仙人言：“甚多。世尊！”

佛言：“大仙人，諸佛如來、十地菩薩倍多

於彼。當爾劫盡大地燒時，於上虛空中，以慈悲智慧身手解救衆生，不令有苦而觸身也。所以者何？以彼諸佛如來、一切菩薩，妙身廣大，相好端嚴，衆生見者，無不歡喜，生正信心，唱如是言：‘我等願於未來世中，皆得成就如是除拔，還得成就如是形色、如是相好端嚴之身。’當於是時，又有心解脫已得阿羅漢果者，或有厭離心生得須陀洹果、斯陀含果、阿那含果證者，或復有得無生法忍者，有得不退轉地者，有得生於四天王天上者，有得生於忉利天上、夜摩天上、兜率天上、化樂天上、他化自在天上者，略說乃至有得生於阿迦膩吒天上者。當於是時，所有一切大轉輪聖王、小轉輪王，及諸方域粟散小王、大仙人等，乃至刹利大家、大婆羅門、大富長者，如是次第，以見如來妙色之身，復見己身於大恐怖生死海中得解脫故，生大踊躍歡喜之心，於如來邊起知恩心，起報恩心；於如來邊聽受法已，各各皆於十業道中作不放逸行，以是方便力因緣故，於十惡道中速得捨離。當於是時，所得十地大菩薩者，以此菩薩眼道所及照了之處大地微塵，彼等微塵雖復甚多，而彼時節諸衆生界，乃至知於煩惱體性汙染不淨，從於無爲涅槃道中入彼無

餘涅槃道者，倍多於彼。汝今當知，諸佛如來爲如是等大利益故，方便顯示劫燒盡也。”

爾時，一切大仙人等聞是語已，生驚怪心：“嗚呼！奇哉！甚大希有！大德釋子向者喚我爲大仙人，發我壽命。我時雖聞如是之事，猶謂非真一切智也。今以世間難中之難，具足施已。我今始知釋子真是一切智也。我於今者，以於真實名號稱之。”

爾時，一切大仙人等即發是言：“大功德聚者，無邊大智者，知一切智者，我見衆生持業星流，各各別異，何處得成真實聚集？惟願世尊爲我解說，令得開悟。”

爾時，世尊即告大仙人言：“汝大仙人，當知無有時方，亦無處所，令得衆生真聚集也。大仙人，惟平等中衆生得聚集，一乘道中衆生得聚集，菩薩地中衆生得聚集，無餘涅槃界中衆生得聚集。汝今當知，如有衆流、河泉、渠瀆，一切川源，皆歸大海；入大海已，得一味住，謂一鹹味無差別也。大仙，汝今當知，所有衆生界若得漏盡者，一切彼處於解脫味中會一味住。汝今當知，我雖說言煩惱平等中衆生得聚集者亦非聚集也。所以者何？譬如大風旋起，吹諸蚊蟲一切聚

集，若風定已，各各星散；如是諸類一切衆生，各各皆爲業風縛故，或墮地獄中彼輩得聚集；業風縛故，或時餓鬼中彼輩得聚集，或有<sup>1</sup>畜生中，彼輩得聚集如是等。”

仙人復言：“一切識一切智者，願爲我說，若有如是如是等輩，已於先世俱人中生共同聚集，今日現在云何可知？乃至一切若在畜生、若在餓鬼，已於先世曾聚集者，云何可知？願爲解說。”

佛言：“大仙人，所有衆生，若先世時，共地獄中曾聚集者，於現在世若相見時，心不歡喜，生瞋結恨，或時頭痛，或復失禁大小便利，當知是輩，已於先世地獄之中曾聚集相。若有如此相貌現時，應當覺知：彼與我身決定已曾於地獄中一處居來。”

時，大仙人復白佛言：“一切能人證大寂者，一切智者，更爲我說，若先世中，曾在畜生共千萬身一處來者，云何可知？”

佛告大仙人：“若彼等輩生人中者，各相見時，結成瞋怨，常覓其便，我當何處覓得其便？是名相貌在畜生中一處同居多身之相。應知決定，我已共彼在畜生中一處居來。若餓鬼中一處居來

<sup>1</sup> 龍藏：有；永樂：有；高麗：在

者，常樂臭穢，復多貪食，自設欲與他心不去離，生慳貪著，或復見彼富貴勢力心生嫉妬，常復欲得彼人財物，見是相時，決定知彼與我同在餓鬼之中一處居來。若有先世同在人中共一處者，於現世中，若相見時，更生欲心。”

爾時，威燈光大仙人復白佛言：“若先世時，共在天中同一處者，今世人中若相見時，云何可知？”

佛言：“大仙人，若有先世，共天中生，現在人中若相見時，各以眼道遠相攝取，共相眷愛。若有是相，決定天中共聚集來。若以如是相觀察者，得知衆生聚集相也。”

爾時，大仙人聞是語已，歡喜踊躍，生希有心，即白佛言：“世尊！我今始知彼衆生輩成實可言大虛誑也，云何迷没不求修學薩婆若也？”

爾時，世尊更復重告大仙人言：“汝向問我，內衆生體有幾微細者？大仙人，若有衆生體可得者，彼衆生體可得作分微細長短。汝今當知，譬如有人從生盲瞽，復有一人問彼人言：‘人者白色爲似何者？’於汝意云何？彼既不見，可得說言此色如是、如是色也？”

仙人答言：“彼人既不明了見色，何敢如此

決定判也？”

佛言：“如是，如是。大仙人，是諸凡夫人如似生盲者，不見衆生體，不可言道如是衆生微細內體長短麤澀。復次，大仙人，眼非衆生，耳、鼻、舌、身、意等亦非衆生，有爲陰分亦非衆生，十八界、十二因緣亦非衆生，衆生名字亦不可得，亦非內空、外空、內外空得名衆生也。所以者何？大仙當知，眼即假名，暫時不相合故；耳、鼻、舌、身、意等假名，暫時不相合；五陰法假名，暫時不相合；三十六種不淨之物，一切假名，暫時不相合。如是等無有衆生而可得也，亦非色等諸塵共相和合故有。衆生色等諸塵各各別異，分張離散，彼等諸法亦非衆生，非命、非養育、無主、無人、亦無有我，皆不可得。復次，大仙人，若有衆生者，是諸如來則不應說四種四諦法，以實無有衆生性故，是故一切諸佛如來得是諸法，如是隨順，如是修行，得如來身。”

爾時，威燈光大仙人爲欲求得一切智故，發大弘誓，作如是言：“世尊！設我今者有大火坑，盡其劫際應處其中；復有大山猶如須彌，其山巖峻，高遠峙立，乃至上到阿迦尼吒天，於彼時中，我身在上，自墜而下；復有大火其聚猶如劫盡時



火，如是等火猛焰熾然，五熱炙身，其日長遠，一日時分等於一劫，如此劫時，以三十日持作一月，滿十二月以爲一年，如是時節盡彼劫際，修此苦行，歡喜甘受，終不因是暫捨精進，而不求於一切智也。”

爾時，威燈光大仙人作是語時，於大會中所有的一切五通仙人，皆悉從座恭敬而起，合掌向佛，作如是言：“世尊！我等諸仙從今已去，皆各勇猛勤力精進，所欲求於阿耨多羅三藐三菩提。”

是諸仙輩作此言已，爾時，世尊即從眉間放諸光明，其光名曰無能降伏者。十方一切諸佛世尊眉間白毫放諸光明亦復如是。當於是時，以佛光明力因緣故，是諸大地六種震動，所謂動、遍動、等遍動，湧、遍湧、等遍湧，覺、遍覺、等遍覺，起、遍起、等遍起，震、遍震、等遍震，吼、遍吼、等遍吼；東湧西沒，西湧東沒，南湧北沒，北湧南沒，中湧邊沒，邊湧中沒，乃至上下湧沒亦復如是。

爾時，十方諸佛世尊於虛空中，在於釋迦如來佛上雨種種華、種種妙香、種種天樂，隨心所愛，令衆見聞。復有乾闥婆王并及無量諸天衆等，皆悉作於五種音樂，以樂如來。復於一切諸樂音

中，出於種種讚歎之聲，歌詠如來。是諸天香又有微風徐徐而動，吹是香氣鬢鬚垂布，於如來前遍覆虛空。復有十方諸來菩薩摩訶薩等一切大眾踊躍歡喜，各於佛上雨種種華、種種瓔珞、種種珍寶、種種雜香、種種華鬘、種種塗香、種種末香、種種衣服、種種旛蓋，諸如是等無量無邊供養之具供養如來。復有餘方無量無邊諸天眾等，皆大歡喜，亦於空中雨天上妙曼陀羅華，及於摩訶曼陀羅華諸如是等供養之具，以供如來。時，諸大眾生希有心，復以自己所著種種殊勝衣服，普散佛上供養如來。

爾時，無能降伏大光明焰，上至阿迦尼吒天，下至阿鼻地獄，遍照十方一切諸佛大會之眾，圍繞一切彼諸如來，作圍繞已，是大光明從彼而來，還至世尊頂上而入。

爾時，長老須菩提即從座起，前<sup>2</sup>至佛所，頂禮佛足，禮佛足已，右膝著地，長跪合掌，以偈頌曰：

無有不因今釋迦 放妙光明遍諸刹  
願佛憐愍我等故 大眾因說除疑心  
以覩世尊現威容 或更懷疑或歡喜

<sup>2</sup> 龍藏：前；永樂：煎；高麗：前

是中或復舉一手 踊躍讚歎佛世尊  
帝釋梵衆四天王 充遍虛空歎佛德  
雨天香華瓔珞具 樂器不鼓出妙聲

爾時，世尊即告長老須菩提言：“汝今見是威燈光大仙人不？”

須菩提言：“唯然，世尊！我已見之。真正行者，我已見之。”

爾時，世尊復更重告須菩提言：“須菩提，汝今當知，是威燈光大仙人者，於未來世，過是賢劫千佛世已，復更有劫還名爲賢，刹名月主，於彼界中，當得作佛，號毗婆尸如來、應供、正遍知，十號具足。須菩提，汝當知之，彼毗婆尸如來出現於世之時，其有得聞是佛名者，無不獲利，猶如意珠隨心願滿。復次，須菩提，汝當知之，今此會中八萬四千諸仙人輩，聞是法本已，悉皆獲得不退轉地，當於彌勒下生之時，一切滿足十地願行，過三千劫已，當得作佛，號曰威燈如來、至真、等正覺。今此大會之中，復有無量億諸菩薩衆聞是法本已，皆得首楞嚴三昧、上上智威三昧、如來受位三昧、如幻化三昧、四大難降伏三昧、意王三昧、海藏三昧、調伏莊嚴三昧、真心藏三昧、清淨三昧如是等。復有億恒河沙等

諸天之衆，皆得住於無生法忍；無量百千比丘、比丘尼、優婆塞、優婆夷，皆悉得於阿羅漢果；恒河沙數天、龍、夜叉、乾闥婆、阿脩羅、迦樓羅、緊那羅、摩睺羅伽、人、非人等，未發心者，皆得發於阿耨多羅三藐三菩提心。須菩提，汝今當知，我見是等大利益故，放是光明。”

爾時，世尊復出舌相遍覆面門，彼舌相中出種種色，種種光明，所謂青、黃、赤、白、紫紺瑠璃、紅縹金色、玻瓈色等；是光明曜遍到十方無量無邊諸世界已，還從如來足下而入。

爾時，無盡意菩薩從座而起，偏袒右肩，右膝著地，長跪合掌，而白佛言：“世尊！如來無有無因緣故現於舌相，惟願世尊爲我等說，何因何緣出現舌相，放是光明？”

佛告無盡意菩薩言：“善男子，我爲無信諸衆生等出是舌相，如來世尊終不以此舌根相故作妄語也。”

爾時，無盡意菩薩復白佛言：“世尊！若未來世諸善男子及善女人，於此經中，若以一句，若以一偈，爲他顯說，其福幾何？惟願說之。”

佛言：“善男子，所有十方諸佛刹中，諸佛世尊眼所見者，彼等一切資生樂具，悉以供養十

方一切諸佛世尊，乃至入於大般涅槃，般涅槃後，復以一切種種寶物起舍利塔，若復有人於此真如法本之中，乃至一句及以一偈，分別爲他而顯說者，所得福德乃多於彼。復次，善男子，若有說是法本之時，能於是中讚言‘善哉快哉’之者，當知彼人，一切諸佛皆共讚歎。若有供養是經典者，當知彼人即是供養於我身也。”

爾時，世尊普觀大眾，觀大眾已，即告之言：“諸善男子，若此經典所在之處，如是地分，一切諸佛皆共憶念。諸善男子，當知是經於未來世閻浮提內諸衆生邊爲大良藥，若人能於是經典中，若自轉讀，若教人讀，一遍、二遍及三遍者，當知是人自請如來轉妙法輪。若有善男子於是經典，若自抄寫，若教人抄，當知彼人即是受持一切諸佛甚深法藏，常得歡喜，速獲安樂，於未來世當得作佛。若有善男子、善女人，應墮地獄者，終不聞是微妙經典；諸善男子及善女人若得聞是妙經典者，捨是身已，必得生於清淨國土。復次，善男子、善女人等，得聞是經，聞已歡喜，信樂受持，廣爲他人讀誦解說，當知彼人速得菩提，畢定不久六根具足，五眼清淨，臨命終時，不忘正念，復當得彼無量無邊百千三昧陀羅尼門，所

謂入於一切諸佛三昧、普照奮迅三昧、總持藏三昧、髻珠印三昧、灌頂位三昧、觀印三昧，復得無字篋陀羅尼、一切法無能降伏陀羅尼、決疑陀羅尼、眞如決義陀羅尼，如是等無量無邊百千陀羅尼，復得五神通，於生死處，正念不亂。”

爾時，世尊即告文殊尸利菩薩摩訶薩言：“善男子，汝已供養無量無邊百千諸佛故，我以此法付囑於汝，汝當來世廣爲他說如是法本。文殊尸利，於汝意云何？汝已過去於諸佛所種種供養，種種恭敬，種種奉迎，是諸福德可得邊際、可得思量不？”

文殊尸利言：“不也。世尊！”

佛言文殊尸利：“若汝於未來世，於此娑婆世界五濁世中，廣宣流布如是法本所得福德倍多於彼。文殊尸利，汝於過去諸世尊所，雖復以於種種衣服四事供養，常令豐足，而汝未曾於是法本爲他人故方便顯說，以如是故，於彼佛邊猶多過咎。若汝於彼過去佛邊，乃至一佛未曾供養，但能於是深妙法本爲他廣說，當知即是於一切佛諸世尊所具足供養，無有過咎。”

佛說是經時，文殊尸利諸菩薩等，及威燈光一切仙人，并餘眷屬、天龍八部、諸鬼神等，一

切大眾，聞佛所說，歡喜奉行。

《佛說大威燈光仙人問疑經》卷終

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙，和南  
聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

# 迴向偈

(一編)

誦經功德殊勝行 無邊勝福皆迴向  
 普願沉溺諸有情 速往無量光佛刹  
 十方三世一切佛 一切菩薩摩訶薩  
 摩訶般若波羅蜜

# 迴向偈

(一編)

願以此功德 普及於一切  
 我等與眾生 皆共成佛道



此咒置經書中可滅誤跨之罪



南无护法韦驮尊天菩萨

